

東
甌
詔
呬



東
甌
詔
時

同
治
戊
辰
孟
秋
開
雕

國家軍興以來東南幾無完郡大亂既次第平



朝廷憂憫元元數下詔書敕大吏慎選賢能牧守拊循瘡痍所以尉安牧養百姓德意至厚於是 澗鄰戴君以治行尤

異擢守嚴州逾二載又移守溫州我溫之被賊也視嚴日淺郡城及我瑞安幸以堅守得全然而四郊之外戎馬蹂躪閭閻虛耗重以一切言利之術徵求煩數而民愈困元氣至今未復也君以名孝廉宰浙久所至厯厯著聲績守嚴之政嘗讀所示宦游紀畧一書而得其詳矣今蒞溫甫一載正己以率屬勤事而愛民剔蠹興利百墜具舉一如其治嚴也而尤

序

一

倦倦於學校倉儲正人心厚風俗夫教養之具人心風俗之故古人言政未有能先之者而俗吏期會簿書日不暇給初無意於爲之也卽有意爲之矣非怠則僞乃君一措注間無不立起有效非以實心行實政何以及此其規畫方畧亦皆紀之以文用示後來蓋欲繼此者遵守勿失且益爲擴充而君之意始愜也是真大有造於我溫者矣昔兩漢之隆尤重郡守孝宣常稱庶民安其田里而無歎息愁恨之心者政平訟理也與我其此者其惟良二千石乎夫天下之大郡邑之積也郡邑治則天下無不治然則有郡邑之寄者使各張其

職如君又豈獨溫民之受其賜哉同治戊辰冬日治愚弟孫鏘鳴拜序

序

二

東甌記畧

潤州戴槃澗鄰氏著

議建同知守備衙門移駐楓林鎮記

禁止溫郡坐筵記

建造府盈餘倉並儲備倉穀記

義倉增積穀石記

重建大觀亭記

改造資福寺記

敕封楊府廟記

目錄

重設採訪局記

重修中山書院並增廣膏火記

重修育嬰堂並籌添經費記

增設義學並籌備經費記

增置義地並掩埋經費記

重修府署二此園記

重修溫郡武帝廟記

重修溫郡文昌祠記

重修溫郡城隍廟記

重修四賢祠並刊諸賢實錄記

重修雙忠祠記

改造昭忠祠門徑並設殉難紳民牌位記

重修存濟祠記

附刻

收復樂清縣城記

樂清辦理善後記

楊府君勘亂顯靈記

目錄

二

議建同知守備衙門移駐楓林鎮記

戴槃

國家設立府縣治暨分防佐貳汛守各官本周禮陳殷置輔遺意蓋使民陶化善俗無自放於禮法之外其意至深且遠顧或謂深山叢箐中民情獷悍非有令長整齊約束風氣驟難變易此永嘉郭明府所以有設縣分治相溪之議也相溪屬永嘉東北鄉界縉雲仙居黃巖樂清山民頑梗恃其深邃遼遠抗糧拒捕習爲固然官以催徵緝捕爲畏途居民小有衅端往往糾衆持械互鬪釀成巨案乾隆年間曾移駐縣丞把總於楓林鎮鎮爲南溪適中地外有土堡周圍二里許布

一

置最爲得宜然位卑職小不足以資彈壓且官不到防日久竟成虛設改絃而更張之分縣之說誠不爲無見雖然有二難焉創始難籌款尤難築城垣立學校設官屬置衙署建神祠工作並興所費甚鉅余再三籌度議移駐同知守備二員於楓林以資表率詢之地方紳耆僉曰可查同知在城職海防事本簡城守及中左右四營有守備四可移一營文武大小各員聲勢聯絡就近彈壓頑梗之習可變緝捕催徵定見日有起色此余區區經畫之苦心也所有籌議情形先已通稟大憲批准入

奏一面委員前往勘估建造衙署工料若干籌定經費錢數
其餘差役兵丁仍照額存舊章無須添設較之分縣之議費
用少而成功易一轉移間可收實效所損者少所益者大將
見化强悍之風爲善良之俗無恃爲政教所不及而自外焉
固百世之利也余與郡之賢士大夫樂觀其成者也故縷述
其事之始末以告後之爲政者是爲記

禁止溫州坐筵記

戴槃

溫俗新婚三日張樂設飲宴新婦於堂眾粲畢集東西兩行坐觀者如堵名曰坐筵見袁簡齋隨園詩集至有客酬酒婦報爵之說此文人之筆好爲夸誕豔稱之以爲美談其實未嘗有是也惟闌入不禁平視無嫌則信有之禮法之家豈宜若是今雖此風稍息尙不能盡除守土者爲之厲禁則可以止矣余守郡以來於教養興修諸大端悉心籌畫此事尙未及禁者誠以禮義修則廉恥生廉恥生則舊染革先其本也今年春郡之諸紳士咸請飭禁余曰可因示以罰並准鄰佑

三

指告而坐筵之風遂息信乎上行如風下應如草地方官果能隨時訓誡無不可易之風俗也夫東甌古稱小鄒魯乃末流頹放奢靡成習甚至相率效尤恬不知怪其於風俗人心大有關係前永嘉縣陳明府刊列婚喪禮節侈靡各條其中有暴殄天物顯干例禁者不一而足業已通詳大憲一律禁止而至今仍未盡遵行禮曰國奢則示之以儉余竊慕羔羊之義欲以節儉正直化導斯民崇實黜華旣躬行以率之矣今而後毋染舊俗毋犯刑章所謂倉廩實而知禮節衣食足而知榮辱父兄子弟轉相告誡使歸真反樸上追鄒魯之風

豈獨坐筵一節爲當痛除積習歟紳民其共勉之余實有厚望焉是爲記

創建府盈餘倉記

戴槃

浙省自兵燹以後各縣倉穀存者無幾余曾有各郡建一府倉存貯穀石之議前守嚴郡時稟請建倉儲穀辦有成案今蒞任溫郡知舊存永豐鹽義各倉俱廢查府署向有南米盈餘一欸特稟明大憲分成酌提存儲倉穀將六年應提之欸就永豐倉舊基建造成倉廩二十二間名府盈餘倉因欸提南米盈餘故也趁此穀價平賤之時動用公欸先行採辦余捐穀五十餘石並前周太守發價買存官穀二千六百餘石一併登倉今已積穀萬石竊謂倉穀爲救荒善策府倉之設尤

五

所以酌盈劑虛屬縣中偶有偏災其本無倉穀者卽可就郡借支便於碾動以視招商買米動需時日者其難易緩急爲何如耶夫天下事可與樂成難與圖始余之建有此倉頗費經營自今以後年積一年有加無已雖有旱乾水溢民無菜色全賴乎此若能久而不廢則造福於民者無窮若夫推而遠之使各縣建一義倉或每鄉建一社倉有志者事竟成尤望於繼起者之爲之也是爲記

義倉增積穀石記

戴槃

儲穀以備荒仿古常平倉遺法此不涸之源也東甌素稱魚米之鄉未嘗仰給他郡故穀價常平然小有災歉居奇者昂其值不肯售貧民之無食者或攘臂而爭致啟衅端咸豐三年已事可鑒也此倉穀之備以救災實以弭患先務之急無踰於此郡城義倉在府學內咸豐六年教授金衍宗勸捐建造其廩房二十一間捐積穀石至同治六年僅存穀千餘石余於六月間來守斯土值米價翔貴全數糶賣以濟民食是秋歲大熟價平買穀還倉增加六百餘石又將各米舖按年

六

籌積經費添儲五百餘石委永嘉縣丞張卓人經理余乃倡捐穀五十石復勸各商民共捐穀二千餘石總計已積穀四千一百七十石照數收倉由此積少成多歲有所增雖至萬石無難焉夫社倉之法善矣然一貸一收有息有耗出納之際非經理得宜恐亦不能無弊設遇歉歲收不足數而所存之穀或有不敷散給之處故社倉祇可行於一鄉以濟官穀之不足可以就近分給至郡城積穀既多原不必專爲救荒而設穀貴則可以平價穀賤則可以增額多多益善民受其利而不知是在官斯上者實心任事而已是爲記

重建大觀亭記

戴槃

考名勝志永嘉華蓋山巔有吸江亭今改大觀亭又名江山一覽載稽郡志不言建自何時蓋闕如也顧亭爲康熙年間溫處道陳公永嘉令馬公効節之所登斯亭者英風正氣猶彷彿見之今已傾圯二十餘年矣余攝郡篆適董事陳承鏘等稟請建造乃捐廉十萬錢並諭令紳士李全英勸捐集貲鳩工興作如舊制仍名大觀亭客有從余遊者請曰江山勝概如在掌中洋洋乎大觀也亭之仍斯名也其以此歟余曰唯唯否否觀之意有大焉者矣觀呖澮之縱橫則思何以利

七

吾民觀閭閻之鱗櫛則思何以樂吾民觀城池之鞏固則思何以保吾民觀山海之險要則思何以衛吾民登覽之頃能無觸目警心乎哉若夫感慨歎歎憑弔二公之忠烈則又與學士文人共焉者也余忝守斯郡豈僅以是爲名勝所係而重煩吾民歟於是繹大觀之意而詳言之是爲記

改造資福寺記

戴槃

華蓋山在甌城東偏爲九斗之口有容成太玉洞道書稱天下第十八洞天山之半爲資福寺始自西晉故俗稱此山曰資福余下車伊始巡視四城登山瞻眺見寺中殿宇窄小房舍漸就傾圯山頂大觀亭遺址僅存山徑亦損壞不堪蓋由軍民斫木掘土牧馬放牛以致形勝之區盡委榛莽不獨無以壯觀瞻亦郡城元氣所關也於是亟議興修適重建大觀亭捐廉泉爲助諭令紳士李全英勸捐集貲乃分七十萬錢鳩工庀材拓其舊而新之榜曰洞天福地旁置山房八間左名左宜右名右有以資憑眺孤嶼峙其北大海環其東西南岷岡甌浦諸峯厯厯在目不啻收羅几案間遊人登亭必於是小憇焉實爲一郡名勝之冠今補栽松木並勒碑永禁私斫盜葬者有則必懲後之人隨時整頓經理得宜庶有以保郡城之元氣而二千餘年古蹟亦永垂不朽焉耳是爲記

敕封楊府廟記

戴 槃

異哉樂清縣城之復也咸豐甲寅十二月土匪瞿逆倡亂虜聚縣城勢張甚大兵未集士民俯首帖耳莫敢撓其鋒忽一日闕然而起齊心殺賊渠魁授首羣匪千七百餘人殲焉城遂以復僉曰此楊府君之助也嗚呼異矣洵非神力不至此時余以剿辦事抵樂聞人言厯厯如繪爲作勘亂顯靈記上其事於大府請於

朝乞加封號順輿情答靈貺也旣而部議飭查未覆至同治六年復請馬中丞題催始得

九

奏准

欽加福佑二字封典甫下余方攝郡篆恭迎

敕書告於神供奉訖考神之受封飭廟自宋始蓋其著靈海澨厯有年所故郡邑皆有廟

國朝自嘉慶以來海匪不靖均賴神力轉危爲安迭資保障神之爲靈昭昭也而樂人平賊之事爲尤奇內無主謀外無兵力羣賊坐堂皇方謀襲郡城而乃一呼四應義聲震天地突起奪賊刀直前刺之殪賊惶遽不知所爲或跪授刃束手就戮無敢抗拒者至婦人豎子咸能刃賊亂定後相顧愕眙

率不解其何故謂非天奪之魄而神助吾民耶先是郡中有
通賊者約同日起事先一日破獲瑞安逆黨某其子忽作神
語白其父謀逆狀事遂洩永瑞之民亦皆以爲楊府君所使
則神之禦災捍患有不可思議者膺封號崇祀典宜哉夫不
煩兵力羣起而攻之蠢茲醜類一鼓盪平使溫台兩郡無攻
剿饋餉之苦非獨神之大有造於樂實大有造於浙東也
聖天子以神道設教其卽此意也夫是爲記

重設採訪局記

戴 槃

溫郡自康熙年間耿逆肆擾而後休養生息涵煦我

國家深仁厚澤浹髓淪肌蓋不見兵革幾二百年矣咸豐辛酉平陽會寇倡亂永瑞平三縣紳民殉難不少同治紀元髮逆竄入樂城永瑞二縣鄉間均被滋擾計先後一載有餘殉難者更不乏人雖屢經設局採訪遺漏尙多余乃捐廉二十萬錢委永嘉教諭王樹榮開局舉辦並諭令司事孫自勵等分赴各縣會同原辦司事悉心採訪查得永嘉縣殉難紳民婦女一百三十七人又續報一百六人瑞安得一百八十七

十一

人樂清得七十三人計五百有奇通詳大憲照例請卹嗟乎浙省自遭亂以來七十六州縣淪陷殆盡存者僅衢之西安處之慶元龍泉溫之永嘉瑞安平陽泰順玉環暨甯之定海七縣兩廳耳而溫居其五他郡率被擾數年獨溫之蹂躪日淺實由士民倡率團練人自爲戰所在舉義旗剿賊故賊不得深入瑞安以南閩疆遂安然而其中或以戰死或不屈死先後採訪呈報者已不下千數百人其他郡之死於亂亡者浙東西不可以數計矣可勝痛哉省城採訪局至今未撤余之重設是局亦誠恐忠義節烈或泯沒而不傳此有司者之

過也是爲記

重修溫郡中山書院並增廣膏火記

戴槃

東甌之有書院蓋自宋儒王儒志先生於伊洛未作之先講學東山倡明理學後人因創爲東山書院由來舊矣

國朝乾隆二十五年郡守李君琬旣興復之乃更闢地於中山之陽名中山書院講會有堂肄業有舍層樓傑閣規制崇闕與諸生藏修息遊於其間所以上溯伊洛之淵源將於是乎在雖然東嘉之學至宋而極盛遊程朱張子之門者三十餘人登進士及賢良方正宏詞孝廉諸科數百人其時固未有書院也而克自振拔如此今旣有其地矣往往狂於記誦

三

詞章之末經史典籍度置高閣以爲無用空疎剽竊苟焉弋取浮名而已古人所謂通經致用者安在無怪自有明以後繼起者難其人也余下車之始首以培養人材爲急查書院房屋歲久失修考試桌檯及一切物用損壞過半乃亟捐廉十萬錢另籌欸三十餘萬錢重完治之置器具几案洪纖畢備使肄業住院者有托焉遂乃詳請大府於捐局串餘項下每年提錢五百千以爲增廣膏火之用分別加給鼓舞而作興之迄今一載有餘負笈來者日益衆課藝亦彬彬可觀蓋坊間向有余書經集句文賦稿余亦間有持贈受而讀之者

咸知本經籍發爲文章良非虛語而醇茂淵懿之作出空疎
剽竊之風稍息由是進而求之儲

國家經濟之用紹先哲理學之傳處爲醇儒出爲名臣安見
元豐九先生醇熙六君子之學問勳業不接踵起也諸生其
勉之哉是爲記

重修溫郡育嬰堂並籌添經費記

戴槃

育嬰堂之設所以補救天地之所不能生與夫父母雖能生之而仍不能生之憾者也嬰兒之生力不能匍匐以就口食又不能呼天呼父母一日不乳哺則立斃矣而天地父母於是乎窮所賴爲民父母者使他人之母母之以全嬰兒之生卽以弭天地父母之憾此三代以上不獨子其子之義也歐郡育嬰堂創自乾隆初郡守金君洪銓李君琬繼之有堂有舍有田租有息銀至詳且備百餘年來悉仍其舊自嘉慶末年內有房屋倒坍日久未建門堂亦俱損壞查舊存發典生

五

息銀兩並塗田二十餘頃每年僅供本堂之用並無贏餘以爲修造房屋及圖匱續乏之備遂相率因循以至於今余蒞任之始通盤籌畫廼捐廉十萬錢並籌欸四十萬錢廢者修之墜者舉之另勸各舖戶書定願捐積少成多以期歷久常行每年可得錢八百餘千又於捐局內提錢二百千撥入嬰堂遂飭各縣之無嬰堂者送至郡城一律留養舊立規條稍加整頓余前蒞桐邑時增置田畝計歲入之費可多收養幼孩數十人及守嚴郡適當兵燹後修造堂宇整舊添新俾孤苦兒女有庇蔭餽粥之所今於溫郡猶前志也喜其成規具

在擴而充之經費充則收養多收養多則遺棄少庶幾吾溫
之遺孩罔不生生用以衍大生廣生之義此郡牧之責也尤
余之所望於後來者也是爲記

義學卽義塾也建房舍峙錢米延師儒以待貧乏者之子弟就學焉所以輔黨庠州序之不足也故或一鄉有之或一邑有之或一郡有之然必歲有常入有餘蓄而後可否則匱匱則不可以久名存而實廢此溫郡各邑義學久而寢廢者多也惟府義學公所在道署前郡志所不載其延師修脯則於掩埋經費項下支銷由來已久余查掩埋一欸本屬不敷又移而用之義學此名實乖舛之尤甚者斷斷不可余乃籌定銀六十兩每年由府署給發作爲義學經費定之以從學名

數別之以束修多寡或損或益隨時可稽昭覈實也余於蒞任之初先已興修房屋置備桌椅壞者葺毀者完皆捐廉泉以治之蓋旣名爲府義學則由府經理亦惟循名責實焉耳此外有衛義學一所今勸廳縣又各設義學一所均自捐廉舉辦義學之增設豈不大有裨於實政哉余復出錢三萬刊印座右銘三字經陰騭文四言詩以便童蒙誦習由是絃誦之聲達於四境因城及鄉廣設義塾此尤余之所深望而未竟其志者也是爲記

掩埋之政仁術也周禮秋官蜡氏有埋而置楬之文月令有掩骼埋骹之事後世漏澤園之設所在多有凡以心古昔聖王之心不使長逝者之魂魄私恨無窮也溫郡舊置義塚山地不一叢葬已滿乾隆二十五年李太守籌廣經費存典錢現止一千一百串計得息錢一百數十千文移作義學之用所餘無幾余乃另行籌款歸入義學再籌添存典生息錢六百千並以前存款息錢全作掩埋經費計逐年可得息錢二百二十餘千又於永嘉縣稅契項下每年提錢一百十千再

六

加租穀錢二十餘千每年可掩埋大小棺骸一千餘具查歷來土工葬棺一具不論大小概給一百六十錢今酌定大棺一具倍給餘悉如舊另購山地一區坐落永嘉縣之十九都翁浦洋地方由上至下計三百三十弓由東至西計二百五十弓動用公款錢一百七十餘千又修整停厰用錢五十餘千是在後來者詳加稽察無負余與前人創建續籌之苦心庶使殄戾全消和氣翔洽仁之至亦義之盡也願無忘澤及枯骨之心也是爲記

重修府署二此園記

戴槃

二此園何爲而作也引流疊石開軒築臺自南豐劉君始有前此者乎曰有之矣斟城李君因桂亭墨池之舊而拓之而新之未嘗以園名自劉君取賢者而後樂此不賢者雖有此不樂之意始以二此名園顧嘗考李君之記在乾隆壬午癸未間劉君則在道光乙未前後七十年當

國家全盛時民和年豐官斯土者與斯民同樂出其餘力以治燕遊之所宜也劉君以來至今三十餘年耳其間東南多故籌餉練兵官斯土者汲汲救過之不暇樂而二此園遂蕪穢不治亦宜也然則樂不樂又不盡繫乎賢不賢蓋有時會盛衰之感焉余來守溫郡幸逢

九

今上御極之六載東南底定余不敏懼不克稱職於是修舉廢墜於教養諸大端次第舉辦日昃不遑冀與斯民同登衽席顧敢自樂其樂耶雖然歐蘇二公之治郡也闢地爲亭曰豐樂築土爲臺曰超然意必有所以樂乎此者今則除剪荆榛葺治廊舍不引流而泉不疊石而山可以臨深可以眺遠乃於隙地內移竹兩行建亭一座榜曰修篁亭公餘之暇偕賓朋僚佐憇息其間雖不敢與歐蘇媲美亦庶幾不忘與民

偕樂之思歟此則余之幸也是爲記

二此園入景詩 并序

園內舊有入景可以棲止者則閱音山館碧淨玲瓏舫味無
味齋筆峯亭品雪菴餘則九折廊轉玉洞及墨池余同治六
年冬進署周視園中滿目荒蕪荆榛一片頽垣破屋舊景全
非惟九折廊轉玉洞墨池遺址尙存乃重加修葺並建亭移
石種竹栽花改名入景因賦詩以記之

金粟舫

船房外有老桂一株今又添種新桂數株故名

層軒面水屋如舟叢桂留人八月秋愛向天香深處坐此身
疑入廣寒遊

五

修篁亭

新於隙地建亭一所左右移竹兩行故名

曲欄干外小池東移植琅玕竹兩叢巧構新亭宜夏日涼生
左右一林風

冷香閣

閣下新種梅花數株故名

小窗常爲看山開閣下梅花手自栽待得天寒風雪裏坐中
時有暗香來

綠天居

窗前舊種芭蕉成陰故名

碧雲低處映窗寮繞屋清陰舊種蕉一色蔚藍渾不異秋聲
還聽雨瀟瀟

清芬室

花臺內新種蘭花故名

春來一室自芬芳靜對幽蘭臭味長
惟有心清能入妙此間小住得聞香

迴環廊

舊名九折廊因此廊並無九折故改名

迴廊幾曲路彎環步履尋幽興
自閒最好引人能入勝牆頭
數點見青山

轉石洞

舊名轉玉洞因此洞疊石而成故改名

疊石玲瓏勢轉斜敢誇名勝似飛霞
嵌空都借他山助一線
天開景亦佳

亭

古墨池

舊名墨池現池邊栽有垂楊故改名

古來舊蹟墨痕遺太守風流恍見之
不學揮毫學種柳而今
池畔碧於絲

二此園楹聯

集句

春秋多佳日

園林無俗情

不可居無竹

同是宦遊人

每聞佳士輒心許

小築幽棲與拙宜

凝華結藻久延立

種花移石自殷勤

幾多怪石全勝畫

欲遺吟人對好山

悠悠花香疏雨相過

蕭蕭落葉清風與歸

重修溫郡武帝廟記

戴槃

甌郡武廟在譙樓東道光十九年不戒於火郡人捐貲重建規模宏敞而黝堊丹漆之事未竟近年來爲練勇屯聚頽壞失修余蒞任後朔望行香顧瞻神宇深懼廟貌弗嚴堂廡弗葺不足以肅將祀事乃捐廉十萬錢另籌欸三十餘萬錢於同治七年三月興工閏四月工竣由是殿宇肅然棖桷秩然輪奐丹雘亦復巍然煥然竊思帝之赫聲濯靈宜無乎不在我

朝天戈所指往往顯靈助順是以崇奉典禮視歷代加隆追封三代公爵每歲春秋致祭皆祀以太牢近又增設佾舞與先師廟儀節同嗚呼可謂盛矣夫祀爲入政之一與食貨並重養民事神本無二理今增新廟貌所以尊

國典而妥神靈也後之人其亦與余有同志也夫是爲記

重修溫郡文昌祠記

戴槃

文昌本戴匡六星卽周禮司中司命唐時有文昌宮歷代相沿祀於學校主科名之事至

本朝崇奉極隆自京師以下至郡邑皆有祠春秋二仲致祭享以太牢典至鉅也永嘉縣學之西有文昌祠爲祭祀及朔望行香之所年久失修廊廡牆垣半就彫剝余蒞任後躬拜祠下竊見棟宇摧殘不足以昭誠敬若不興修有司之職曠矣遂捐廉十萬錢另籌款二十餘萬錢重加整理闕者補之舊者新之閱兩月告竣區區修舉廢墜之意所以重科名之報而申敬神如在之誠竊願與後之守此土者共勉此意焉是爲記

重修溫郡城隍廟記

戴槃

郡邑之有城隍猶之乎府縣也均有守土之責是以操興養立教之權以奠安蒼赤責在府縣司福善禍淫之柄以翊贊幽明責在城隍其有水旱不時災祲洊至則官與民咸請命焉爲闔邑生靈所倚賴於是民和而神降之福否則禍亦隨之則惟明乎事神之道而後能治民彰彰明矣東甌郡城隍廟在府治西創造之始志無考咸豐三年正殿燬於火郡人集貲重建規模宏敞迄今久未修葺前任周太守諭令紳董勸辦需費浩繁卒不果余蒞斯土核實估計土木丹漆工料

三

共需若干首捐廉十萬錢又籌款二十萬錢並勸各邑令共集捐錢三十五萬錢剋日興工正殿寢宮次第修整其中舊有園亭之勝靡不一律完固三閱月而告成夫神之所棲不壯不麗不足以示威靈郡自削平寇盜雨暘時若年穀屢登疵癘不作是誰之賜歟而官斯土者顧於事神之道第曰奉行故事已耳則其於治民之事亦惟因陋就簡已耳幽明殊途理無二致守土之謂何其有愧於神也多矣余之爲此役也不敢謂質諸明神而無愧亦以盡守土之責云爾是爲記

重修四賢祠記

戴槃

溫郡四賢祠舊在鹿城書院中祀程明道伊川朱晦庵張南軒四先生以鄉賢周行已許景衡等三十三人配皆從遊四先生之門親見伊洛淵源者也當是時嚴黨禁斥僞學者蠶起而此邦先哲篤信好學不遠數千里師事四先生卒爲名儒俎豆千秋可謂盛矣顧祠創於前明郡守鄧君重建者爲郡守衛君後經兵燹僅存數椽

國朝乾隆二十年督學雷公復建而加擴焉未幾爲營兵蔣姓所佔冒蔣叔蒙後裔侵蝕祀田今且祠圯祀廢木主朽蠹

三

都人士至不能舉其姓氏何以使後學者聞風而興起歟余於同治丁卯攝郡篆深懼無以紹前人創建之意乃籌款興修新栗主定春秋致祭押令蔣姓遷移祀田已賣者捐廉續之祠內留存者按畝而清理之所收租息爲修祠宇祭祀之用並刊附祀諸賢實行錄以備省覽易鹿城書院舊額爲四賢祠紀實也夫諸君子宗仰四賢如泰山喬木流風餘韻六百餘年矣卽斯祠之建旋廢旋復出之榛莽荒穢之中者亦屢矣今又煥然一新世道人心絕續之所繫豈偶然哉抑余之爲是舉也將使郡之士瞻仰遺型進求夫諸賢之講學論

道與夫事業文章更世千百而不朽者度非膠庠其姓氏卽
可詡詡然曰吾四賢之徒也韓子曰莫爲之前雖美弗彰莫
爲之後雖盛弗傳永嘉之縣豈必遂無傳人哉此固守斯土
者之所厚望也是爲記

重修雙忠祠記

戴槃

雙忠祠在郡城華蓋山上祀溫處道陳公丹赤永嘉令馬公
界康熙十三年耿逆自闕窺伺溫郡二公集文武登此山議
戡宇實總兵祖宏勛從二公同時被害三十五年浙江巡
撫線公題請

敕賜建祠崇祀

御書雙忠祠額忠魂義魄千古爲昭矣嗣後馬氏後裔捐田
百數十畝作修祠祭祀之用爲營兵侵蝕祠宇剝落不加修
葺余到任後捐廉五萬錢葺而新之並將原置田畝逐一清

美

理將每年所得租息錢百數十千歸祠應用慨自耿逆之變
至今垂二百年二公殉節事父老猶能言之洎辛酉壬戌間
叠遭會匪粵逆肆擾而合郡士民同仇敵愾能戰能守深明
大義卒保城池安知非二公之靈爽有以默相之者歟守此
土者上以體

朝廷表忠之意下以作吾民向義之風俾斯祠田產租息永
永不廢其所係顧不重哉是爲記

改造昭忠祠門徑並殉難紳民設位記 戴 槃

郡城之南建有昭忠祠左祀忠義右祀節孝前周太守委員
修理規模雖小祠宇尙新惟大門在田野間春秋祭祀官員
齊集出入不便遇雨則行泥淖中非所以將誠敬也余提祠
內公欵五萬餘錢另闢大門薙豐草甃石路如砥如矢趨踰
之儀肅焉又捐廉俸二萬餘錢將永嘉縣殉難紳民婦女之
奉准入祠者五百餘人製造木主送祠祭祀祠內向有田十
四畝所得田租亦查明歸祠應用夫忠義節孝足以維風教
而正人心載之志乘錫之祀典英風勁節與九斗相高矣邦
之人士列拜祠下其必有曠世而相感者則余之爲此舉亦
未始非政教之所繫也是爲記

重修存濟祠記

戴槃

祠名存濟何存無祀及有子孫而不能奉祀之主於祠中志厚也夫無祀則主無所歸子孫不能奉祀至無片瓦尺椽之庇主亦無所歸勢必委棄榛莽甚或供薪爨之用慘矣哉傳曰鬼猶求食食既不可得矣至不能保其數寸之主於身後將謂其人已死其鬼不靈耶固仁人君子所宜心惻也祠在華蓋山雙忠祠後向止棟宇三間不知所自始迄今歲月寢久木主香爐無可位置舊存之主亦大半朽壞余憫之諭董事查明登簿以備稽考祠之左右添創房屋六間請於方觀

三

察發軍工廠木料百株余首捐五萬餘錢又籌款五萬餘錢爲工用之需旣蒞事慨然曰今而後苟能使閭閻樂利無饑無寒彼爲子孫者不致如葛伯之不祀幸也卽不然與無祀之主共存斯祠位置有所未始非仁術之一端也余喜其風之厚尤願郡之人常體此意永永勿替也可是爲記

附刻溫郡各楹聯

關帝廟

乃聖乃神乃武乃文至于海濱德威惟畏
自西自東自南自北方行天下祀事孔明

文昌祠

寶氣煥層霄耀天上星輝光聯北斗
文章行大塊主人間風教化及東甌

府城隍廟

作善降祥作惡降殃正直爲神莫道竟無前世劫

日哲時暘日肅時雨燠寒成歲惟期長此屢年豐

楊府廟

出守到東甌幸十二年中重瞻廟貌

頒恩來北闕正九重詔下甫答神庥

四賢祠

學重心傳千百載同明聖道

世留手澤卅三人不愧儒宗

文信國祠

孱王幸一息尙存涉險履危能脫身於京口

正氣與兩間常在成仁取義留遺像於江心
雙忠祠

爲國捐軀公沒神靈常在

登亭弔古我來祠宇重新

資福寺山門口

此山勝桐嶺松臺翠微青嶂

斯地有石潭牛塢丹井蒙泉

資福寺山房

天開斜景徧

山遠與人齊

舉頭望明月

盪胸生層雲

大觀亭

大觀在上

小住爲佳

孟樓

憶故鄉兩點金焦同斯佳境

到此地一樓風月助我清談

府大堂

因人成事因地制宜墜舉廢修惟在實心實政
以儉養廉以勤補拙上行下效要期有守有爲

府二堂

居一日官盡一日心無怠無荒當思於物有濟
治百姓難愛百姓易同好同惡惟在強恕而行

中山書院

地傍中山築室於茲惟講學
居同廣廈寒儒到此亦歡顏

三

育嬰堂

保息重周官曰仁曰慈問何以心推赤子
併幪同夏屋是究是度要無慚身坐黃堂

收復樂清縣城記

戴槃

甲寅冬十二月樂清瞿振海等謀爲亂倉猝變起縣城不守姚署副將暨趙典史均遇害逆黨四出賊焰甚張省中警報叠至大吏爲之震驚適余委署湯溪縣事尙未起程赴任其時撫軍檄發大兵令溫州葉總鎮帶兵千名處州毛總鎮帶兵千名台州吳總鎮帶兵千名委余亦帶兵勇千名會同攻勦並兼辦各路支應余曰任大責重宜檄委司道大員一人前往勦辦撫軍曰藩司無出省之例臬司有留防之事運司催徵鹽課糧道辦理海運均關緊要汝卽日起程無稍諉卸

一

遂改授台州司馬之職余應命遄行是役也催督兵勇兼程並進中途得賊勢猖獗信將謀襲郡城余憤且懼余聞溫郡地方濱大海臨高山樂清界乎溫台之間山海爲之阻隔將欲進兵攻勦人力又恐難施正在籌策之際我兵已抵溫郡翌日樂城卽報收復夫樂城何爲而復也樂之士民同聲倡義自己及午渠魁授首賊匪殲斃者千七百餘人城遂以復在婦人豎子咸能手刃斃賊厥功尤奇檢點我民無一傷亡此其中有神助焉余厯觀史冊所載古之善用兵者興師滅寇靡不藉資兵力今乃未煩一兵未戰一士卒能殲除醜類

立奏膚功樂之人既無首倡又無軍器若使賊軍抗拒無以
制勝乃天奪其魄一鼓盪平人力不至於此余以從事樂清
得晉升階是爲記

樂清辦理善後記

戴 槃

余抵溫郡之翌日樂城收復將所帶兵勇截留郡城首赴樂清安撫居民並查點屍骸令署樂清縣李君掩埋事畢適運司慶公由省赴台州查辦金溪土匪滋事撫軍委赴樂清同余辦理善後事宜余自到樂後招集流亡撫恤難民其餘練勇設防賞功問罪靡不次第舉行而於查拏逆黨一事搜捕尤急未及兩月先後拏獲要犯僧靖毛等二十餘名首逆瞿振海等家屬二十餘名又謀襲郡城未行在外創刼之犯王得宗等十餘名在監逃逸應行斬絞之犯徐時鑑等十五名

三

晝夜承審通詳各大吏或解省定擬或留禁候示以外所拏脅從之民不可勝數余概行訊釋絕不株連全活甚衆余查瞿逆之據縣城也私雕印信分設偽官鄉城之民被脅者不可以數計倘欲盡法懲治則誅之不勝誅且恐急則生變是以運司有欲辦之案余屢爲之力爭乃止時有犯人徐錫禮者供在官書役被脅者十餘人運司派員查拏書役聞之聲言樂清被脅民人盡欲拏辦煽惑大衆滿城人心皇皇幾至釀成事變余乃卽日傳各書到案訊明爲之開釋而人心大定余豈好爲其寬而不爲其嚴哉亦猶是古人所云殲厥渠

魁脅從罔治之意也虹橋爲瞿逆起事地方瞿逆伏誅省中官兵旣至不得明示以威運司行抵虹橋余首請拆毀瞿逆宗祠次及倪陸兩姓以示孫子之謀逆者祖宗不能有其祠用昭炯戒居民悉令安堵無恐而民心攝服後有樂清縣役因赴虹橋拏案妄言此地居民有劫奪要犯一事其言達於上派都司宋某會同樂清營縣往拏某等未敢前去乃同稱虹橋地民有抗拒之勢其時余同運司已移駐溫郡令余選調兵勇前往勦辦余謂此事無煩兵力乃隻身帶隨役數人親至其地曉諭居民所要之人立時送出訊明情節乃知前言之誣其事遂息而大獄不復再興是役也自甲寅冬十二月至乙卯四月夏旋省乃得竣事是爲記

古之神人有功德於民廟食百世載之志書班班可考後人道其姓氏里居靡不詳悉溫郡各屬有楊府君廟鄉之人迎神賽會咸致敬焉咸豐甲寅十二月樂清瞿振海等聚衆作亂縣城不守逆黨羽翼甚多勢難撲滅乃未幾而樂之士民齊心殺賊登時四處響應外則奪門而入內則羣起而攻雖婦女幼童無不持刀相助頃刻屍橫遍地樂城遂復萬姓咸曰此楊府神之力也當賊之初起謀時溫州永嘉等縣意欲同時襲取郡城之爲內應者先一日破獲故未及舉發瑞安

五

逆黨某某其幼子忽若有神附身如顛狂狀自言其父謀逆先期亦卽道破機關已露未敢肆行此二縣者百姓咸以爲楊府神所助而樂人殺賊之事尤彰明較著余收復樂清後聞士民言感且惕乃詣真君廟齋肅報謝因求神之時代事蹟無可考者迨至郡城謁神廟於瞿嶼山之陰得舊碑一字漫漶難辨命工洗剔之始可讀乃知神蓋宋時人也初得道於桃山歿而靈感迭著遂受封敕廟明嘉靖間浙東按察副使袁公以禦倭出洋忽大風起壞倭船送公舟抵岸無恙歸神示之夢次日詣廟行香乃恍然於夜間所見之神卽此神

也遂立碑於楊府山之廟以紀其事云余以神之能爲民禦
災捍患請於大府奏加封號用崇祀典余感神之德誦神之
功願神之護國佑民永永無極甌之人終不忘夫神貺也是
爲記

京口爲江南名郡金焦北固諸山雄傑特起長江如襟帶出肘腋間磅礴鬱積發爲偉人自古然矣

國朝自京江相國以來名臣輩出戴氏爲潤州望族內而卿士外而封疆代有傳人 澗鄰觀察生長是邦邃於經術著

集經文賦稿卓然成一家言及奉銓來浙所在以實心行實政始終如一名公卿咸推爲經術飾吏治方之兩漢循吏云方公之總理清賦局也力主分成量減及裁津貼之說讀減漕諸記詳審精密抒下情宣

上德藹然仁者之言先是我嘉善畝田空糧民困百數十年跋

公請奏裁大府允行仰邀

朝廷未有之曠典飲水知源宜何如感也 咸彌 自咸豐甲寅

秋司瑞安鐸是冬樂清土匪滋事縣城不守公以剿辦來甌事既定招流亡恤難民訊釋脅從全活甚衆固已聞之熟矣

逾年宰桐邑軍書旁午收漕勘災於萬難措手中出以獨斷民情貼服鄰境咸取法焉稱我鄉賢父母最 彌 又得聞之同

治乙丑守嚴州兵燹後瘡痍滿目公乃墾荒儲穀興學校建祠署未一年百廢具舉嚴郡舊有九姓漁課由明至今五百餘年遂力請於大府咨部裁革並令各漁戶改賤爲良而積

習爲之一變

彌

嘗讀宦游記畧得聞其詳然猶未及親見公之爲政也及丁卯夏來蒞溫郡日高春視事夕奏功皇皇若不及如故也於是修祠廟建山亭重整中東書院增廣膏火創造府盈餘倉儲備穀石以及嬰堂義學義塚各善舉經費靡不籌添所以爲教養計者罔弗周永嘉之柑溪民情頑梗則議移駐同知守備於楓林俾官民相親潛移而默化之申請大憲見諸施行坐筵爲溫郡陋習又能革而禁之凡此實心實政如雨露不擇物而施如泉源不擇地而湧公嘗謂做一日官行一日事今實親見之而後歎公真不可及矣

彌忝

跋

二

附癸卯同年幸又爲所屬得見公治溫善政旣出所撰東甌記畧見示言皆徵實以今準昔猶一日也所謂德被生民功施社稷經術之效孰大於此他日建牙開府爲一代偉人爲兩浙名臣是編特嘗鼎之一臠也敢述所聞見者質言之而綴於簡末同治七年歲次戊辰冬十月嘉善戴咸弼謹跋

留別東甌士民 七律四首

戴槃 澗鄰

來往均逢夏午時匆匆忽又代瓜期敢云霖雨千家徧但有
清風兩袖隨駟馬高車非我志一絲半粟亦民脂慚無實惠
施黎庶萬口空鐫德政碑

十年往事記前游卯歲重來序已週 咸豐乙卯因樂清土匪滋事奉差來溫至同治

四年再到溫自昔神功多福佑 余前收復樂清請加 楊府君封號至余權篆溫郡已十

二年始蒙 奏准 敕封福佑頻年樂土慶豐收工成廉俸清分鶴 余修文

武廟郡廟及四賢祠雙忠祠存濟祠書院嬰堂義學皆捐廉首倡以成其事政在辛勤拙補鳩縱

目江山憑一覽 余建大觀亭落成以資憑眺 大觀亭一名江山一覽亭敢希王謝舊風

詩

流

敷政端憑教養先廢修墜舉亦求全視如己事皆民事賴有
前賢啟後賢學紹程朱期克繼名稱鄒魯幸猶傳從茲薄俗
澆風革不獨奢糜罷坐筵

舊時五馬記行春再到嚴陵證夙因 詔下九天 君

命重轅攀萬姓眾情真海山俯仰成陳迹琴鶴追隨自在身
此去東甌重話別願留鴻爪慰斯民

東甌闔郡紳士公啟

懿夫推誠布治神君頌以三年

特簡眞除慈母離於一日憶自我

澗鄰觀察憲戴大公祖大人之權守甌也心期報

國政在養民循良第一龔渤海斂手後賢治行無雙黃潁川
比肩往古固已二千石之知名魚懸虎渡十萬戶之受福鹿
夾雉馴矣 公簪纓華胄鉞鏤名門讀書舉制科作宦典劇
郡冠大江南北之通儒徧兩浙東西而游宦世欽石氏門庭
增光史乘民愛馮君兄弟迭起謳歌美政紛綸請陳梗概添

啟

二

膏油而興講院加意儒林廣儲積而葺社倉殫心歉歲溥仁
人利預籌鄉會川資歡寒士顏會見科名蔚起諸凡義塾聿
新造小子也壇祠衆建肅民心也恩周鞠育恤藐孤也惠普
掩埋澤枯骨也構臺榭則山川倍勝禁追呼則撫字逾恆日
坐堂皇寅清益勵刻求民隱辛瘁忘疲悉畏威而懷德遠邇
臚歡統隆舉而廢興經猷丕煥茲當萬物含和之日適值三
年報最之秋恭膺

簡命移守睦州此地緣慳他鄉福厚及瓜而代行李將離吾
儕久隸仁帡同遊惠宇挽留乏計報稱有忱爰製德博化光

四字額以誌不誼增拔薤蔭棠之思長偕謝客亭留成郇膏
傳雨之區輸與巖陵山峙他日建牙開府還期騶從重臨此
時臥轍攀轅可乏驪歌相送所冀方聞碩彥弁雅通材共有
戴天至悃各成擲地佳篇况切梓桑涵濡已久皆叨蔽芾揚
扃何難舉駢詞與韻語都密咏而恬吟不定體裁聊當去思
之頌先爲隍引彙成餞別之篇賢大夫非阿私所好請攷
公厯官行己之循聲都人士定喜騁其才請示我頌德歌功
之鉅製謹啟

啟

三

東甌留別和章

上卷

同寅親友和章均用原韻

秦湘業

澹如

龔黃治行冠清時王謝風流遠可期好水好山頻管領一琴
一鶴自追隨颶薰麥隴車初下雨潤桑田輦載脂五邑謳歌
胥感戴請看道左去思碑

甌江兩度紀來游撫字心勞惠澤週新綠田多催夏種陳紅
倉滿備秋收神功孚應災驅鱷吏治均平化協鳩後樂何如
同樂好開園不獨集名流

一

上

輸君五馬著鞭先經濟文章事事全儘有江山供一覽可無
觴詠繼前賢題詩孤嶼愁難和留像名藍合並傳

江心寺有文信國及

先侍郎石刻像嘗拓以見寄

君

父老攀衣渾欲泣也如當日北亭筵

仁風到處播陽春雁宕龍湫話宿因士願識韓名望重人思
借寇性情真頌聲此日聽盈耳著作先時早等身去去巖陵
迎竹馬棠陰重慰舊黎民

王蔭棠

芾南

昔年攝篆憶同時

丁卯五月間事

瓜代慙余早及期牛後從來讓雞

口蕭規猶幸得曹隨

余未攝金衢嚴道時君已先署嚴州

能剛早已知無欲

不潤何須論處脂溫州嚴州自他人視之有肥瘠之殊君正己率屬視之無異也君競爽二

難賢太守哲兄友梅時守廣州東南棠棣合成碑

十載慇懃記宦游君所著宦游記畧不脛而走東西浙水惠全週詩刪漆

洧漁蠲課君裁九姓漁課去百年積弊賦減租庸歲有收杭嘉湖減漕事君董其役

風化從茲除佩犢閭閻不更歎無鳩烏龍山訪希文蹟始信

先生第一流

雅亮清公比孝先牛刀小試目無全冰心自矢懷前哲俗骨

難醫陋世賢經術專家誰得似君精熟尚書循良有譜定須傳懷

君不盡離羣感寂寞年時北海筵自君典郡文譙頗形寂寞

二
上

梨棗知名二十春君所著書經集句文賦幾於家置一編得諧宦轍亦前因締

交金石逢君少閱世蹉跎愧我真矯矯青雲看偉望堂堂

白日負閒身小詩偶作巴人和痴嗜休輕付手民

薛時雨慰農

春湖五馬送君時又見公堂受代期舊郡篠驂迎郭伋征

途芋帛送何隨殘黎亂後安耕鑿新婦筵前洗黛脂君革溫州坐

筵陋習往日風流推謝客磨厓重勒使君碑

鴛鴦湖上舊同游星紀推遷又一週報最有書僚案式自縣君

令躋郡守所至政蹟均刊刻成書採風入告史官收摩天翮健追黃鵠控地

形微笑鸞鳩試向東甌談治蹟澄江如練水安流

此去嚴陵慰勞先瘡痍爾日漸安全經生各讓侍中席漁父

能誇太守賢

用張
蟻詩

叔度重來輿頌熟鮮于一路福星傳何時

容我春江住爛醉鱖魚櫻筍筵

煙霞沈痼幾經春蘿袞從知各有因管鮑論交翻覆少張高
尋夢性情真江湖放浪懷同輩風月消閒老此身今日與
君重唱和頭銜自署葛天民

楊鏡涵 蓉初

餞行正值餞春時惜別還思訂後期分隔雲泥心景仰身非

三

上

琴鶴夢追隨羨

公刻羽看垂翼愧我元駒尙戀脂此地攀

轅彼望歲政成到處誦豐碑

屈指趨陪海上游光陰荏苒歲將週殫彰神力封書奏澤濟
屠糧獲稔收此日鬻宮應繼鳳昔時廟宇仗工鳩須知太守
恩波廣直與甌江春水流

祖生羣讓著鞭先循吏儒林品望全手澤式孚名宦蹟口碑
爭說使君賢集經詩賦三江重華國文章兩浙傳驀地春風
縈別緒四圍山水悵離筵

愧無佳句和陽春聊述萍踪各有因

帝命迪成新未艾

輿情早洽別彌真集成一品傳斯世名在千秋定及身還望睦州山上月不徒分照海東民

錢國珍 子奇

萍跡甌江憶昔時曾盟江水證心期

珍曾奉檄三署瑞篆

幸聞惠政懸

蒲治未得前驅負弩隨仁粟非同儲蕙苾廉泉從不染膏脂

遙知華蓋山亭誌

前蒙賜新修大觀亭碑誌

應比羊公峴首碑

兩浙旌幢記宦游聲名十郡已咸週弊除轉漕民生賴

觀察觀

漕有賦正荒田地利收

觀察總

出郭清風車夾鹿行途甘

雨屋鳴鳩侍中經術敷經濟雅望端宜邁眾流

四

上

清畏人知率屬先都從善後計安全龔黃雅化追前蹟王謝

流風繼昔賢再治嚴陵

心簡渥徧聞海國口碑傳竭來

幾度瞻旌旆聊供山殺話別筵

舊頌桐君閣十春題詩紀盛續前因

咸豐八年曾奉題桐溪紀畧

治清海

寓塵氛靖坐領名山面目真豸繡朝

天看近日熊車載

道惜勞身鹿城多少攀轅句留得甘棠慰眾民

陳王齡 鐵峯

去任逾榮赴任時攀轅臥轍尼行期滿城父老壺漿餞夾道

兒童竹馬隨治行交推彰德化

士民送德博化光匾額

風標卓立戒章

脂長生到處馨香祝到處設長生祿位牌不獨謳歌載口碑

十五年來紀宦游東西兩浙感恩週桐山作宰甘霖降君宰桐

為民求雨得甘霖梅嶺分符絕祀收君蒞嚴求子陵裔僅存二人為籌款奉祀賦減四

郊除碩鼠課裁九姓慶安鳩君請裁九姓漁課舟居皆得陸居文章政事俱

千古君有書經集句文賦稿行世不愧人稱第一流

東甌布政積倉先君蒞甌首積倉穀更有遺嬰賴保全君修嬰堂籌添經費

眾建祠壇崇廟貌文武廟郡廟及四賢祠雙忠祠存濟祠均次第修理聿新講院啟英

賢君修中山書院並增廣膏伙風希王謝高蹤繼學闡程朱道統傳君崇祀

四賢並刊刻附祀諸賢實錄儉德清操堪化俗此邦忍復坐華筵君禁止坐筵

五

陋俗

將離惜別感三春况是葭葦有舊因兩載論心關性分一生

接物總天真嚴陵又見添新政滄海猶然繫此身遙想旌旗

方蒞止郊迎鼓舞睦州民

陳桂齡揖清

昔年身到武林時屈指剛逢歲暮期奉檄羨君邀賞識臨

民愧我未追隨化行風動孚遐邇駕鳳星言載輦脂剔弊除

奸胥吏肅頌揚一路口鐫碑

旌旆東來作宦游慈祥愷惻湛恩週典崇大比多方計惠及

遺骸是處收宥罪從輕歌德駿庀材舉廢喜工鳩秋成兩載
豐穰慶霖雨旁施厚澤流

穀積千倉養育先整躬率物教兼全歡欣羸得兒童躍鼓舞
交推太守賢願紹龔黃名其播不隨王謝話同傳江山一覽
閒登眺敢事奢華列綺筵

嚴陵別後幾經春此日重臨續舊因令出惟行綱紀立子來
偕樂性情真訟詞悉泯講張幻節儉何慙俯仰身末俗澆風
羣感格歌功今又徧斯民

陳彭壽

椿伯

六

上

睽隔慈顏五載時精神如昨慰心期樛材不棄栽培厚茅塞
能開步履隨大澤羣覘施兆庶坐筵俗更禁韋脂吏胥弊絕
輿情洽滿路聲聲聽口碑

回思往歲詠來游浩蕩仁恩蔀屋週積穀陳陳倉廩裕掄才
濟濟譽髦收網開三面功真駿工集羣材事盡鳩養老恤嫠
兼保赤其欽大德比川流

臨別殷勤造士先爲謀生計策安全一心深體黎民隱闔郡
同稱父母賢願借寇恂懷莫遂治同龔遂績常傳試看耆老
攀轅意遮道而來繞別筵

任卸嚴陵兩度春
楓宸特簡續前因
他年敷教恩同沐
此日重來道樂真
有要有倫齊以禮
克勤克儉本諸身
紀綱聿整今猶昔
又聽謳歌徧士民

